

COLOSENSES

Pablo Colosas marārē ōādoredea

1 ¹Yu Pablo, marīyagu Timoteo merā musārē ōādorea. Marīpu gāāmederosūta Jesucristo yure igūyare buedoregu pīmi. ²Irasirigu musārē Colosas marārē Marīpuyarārē Jesúre gūñaturari merā buremurārē gojáa. Marīpu āārínigū musārē iritamū, siuñajārī merā āārīrikumakū iriburo.

**Pablo Jesúre buremurāya
āārīburire Marīpure sērēbosadea**

³Marīpure marī Opū Jesucristo Pagure musāya āārīburire sērēbosariku usuyari sīa. ⁴Gua, musā Jesucristore buremurī kerere, gajerārē Marīpuyarārē āārīpererārē maīrī kerere pébu. ⁵Iripoegue musā Jesucristo masakare tauri kerere ōārō péduripíbu. I diayema kerere pérā: “Marīpu Jesucristo merā marīrē taugukumi. Marīrē taugu, ūmugasigūe igū merā ōārō āārīmakū irīgukumi”, āri masību. Irasirirā Jesúre buremurā, gajerārē Marīpuyarārē maīa. ⁶Āārīpererogue Jesúya kerere weremakū pérā, gajerāde musā iriderosūta Jesúre buremunugāma. Irasirirā igūyare irinugāma. Musā iri kerere pépurorirāgueta: “Marīpu marīrē maīsīā, Jesús merā marīrē taugukumi”, āri masību. Irasirirā: “Iri kere diayeta āārā”, āri masīa. ⁷Gua maīgū Epafra musārē iri kerere weremī. Igū, guare moātamugū, Cristore moāboegu, igūyamarē musārē weregū āārīmi. Iri moārīrē neō piribemi. ⁸Igūta guare musā gajerā Jesúyarārē Ōāgū deyomarīgū iritamurī merā maīrī kerere weremī.

⁹Irasirirā Epafra musāya kerere guare weredeana merāta Marīpure

musāya āārīburire sērēbosanerā, inugedere āsū āri sērēbosanfīkōāa: “Guapu, igūsārē Ōāgū deyomarīgū mū gāāmerīrē masīpeomakū iriburo, muyare pémasīpeomakū iriburo”, āri sērēbosāa. ¹⁰Marīpure musā marī Opū Cristoyarā āārīsīā, igū gāāmerōsūta ōārō irinīburire sērēbosāa. Igū gāāmerīrē irirā, ōārī direta irirākoa. Marīpure masīnemorākoa. Musā irasirimakū iāgū, usuyagukumi. ¹¹Marīpure turatarigūe igū turari merā musā ōārō yujupūrākuturarā āārīburidere sērēbosāa. Irasirirā, ñerō tarikererā, āārīpereri musārē waaburire gūñaturari merā, usuyari merā āārīrikurākoa. ¹²Marīpu marīrē igūyārā āārīmakū iridi āārīmi. Irasirigu igūyārārē: “Yu gosewasiriri āārīrōgūe āsū sigura”, ārīdeare marīrē opamurā āārīmakū iridi āārīmi. Irasirirā, musā Marīpure: “Mū guare irasiriburi, ōātaria”, āri, usuyari sīburidere igūrē sērēa. ¹³Igūta marīrē naītīārōgūe āārīrā irirosū āārīnerārē taudi āārīmi, wātī doresūnerā āārīnemobirikōāburo, ārīgū. Igū magūrē igū maīgūrē marī Opū āārīburo, ārīgū, irasiridi āārīmi. ¹⁴Igū magū boari merā marī ñerō irideade wajare taudi āārīmi. Irasirigu marī ñerī irideade kātidi āārīmi.

**Cristo boagu, marīrē Marīpu merā
siuñajārī bokamakū irideade**

¹⁵Marīpure iāña máa. Cristo igū magū, igū Pagū āārīrikurire imudi āārīmi masakare. Igū magū āārīpererā dupuyuro, āārīpereri dupuyuro āārīsīadi āārīmi. Irasirigu āārīpererā Marīpu irinerā nemorō Opū āārīmi. ¹⁶Cristo merā Marīpu āārīpererā ūmugasigūe, i nikūge āārīrā, marī iārārē, marī

iāmerādere iridi āārīmí. Gaji marí iāirirē, marí iābiridere iridi āārīmí. Oparārē, dorerārē, turarārē, ūmugasigie āārírārē, i nikūgie āārírādere āārīpererārē iridi āārīmí. Irasiriro āārīpererā, āārīpereri ĩgū iridea āārā. Irire irigu: “Yū magūya āārā”, ārīdi āārīmí. ¹⁷Cristo āārīpererā, āārīpereri dupuyuro āārīsīadi āārīmí. Irasirigu ĩgū turari merā āārīpererārē, āārīpereridere i ūmugue ĩgū gāāmerōsūta keoro āārīmākū iriními.

¹⁸Marí ĩgūrē būremurí bumarā, ĩgūyarā āārīsīā, ĩgūya dupū irirosū āārā. Irasirigu marí dipuru, marí Opū āārīmí. ĩgū boadero purū, marí āārīpererā dupuyuro ūmugasigie masā murīapūrōridi āārīmí āārīpererire, āārīpererārē dorebu.

¹⁹Marīpū ĩgū gāāmederosūta ĩgūrē āsū ārīdi āārīmí: “Yū magū, yu irirosūta āārīburo”, ārīdi āārīmí. Irasirigu Cristo āārīpereri Marīpū āārīrikarire opamí. ²⁰Marīpū āārīpereri i ūmumarē, āārīpererā i ūmugue āārírādere ĩgū merā ōārō āārīmākū gāāmegū, Cristore iriudi āārīmí. ĩgū gāāmederosūta Cristo curusagie boagu dí béorí merā ūmugasie marārē, i nikū marādere: “Yū merā ōārō āārīburo”, ārīgū, irasiridi āārīmí.

²¹Iripoegue musāde űērīrē iririkusīā, Marīpū merā ōārō āārībiri, ĩgūrē iāturi, űērō gūñaananerā āārībú. ²²Musā irasū āārīkererupū, Marīpū, Cristo boadea merā musārē ĩgū merā ōārō āārīmākū iridi āārīmí. Cristo, marí irirosū dupūkugū űērō tari, boadi āārīmí. Irasirigu Cristo boadea merā Marīpū musārē ĩgū pūrogue ĩgūyarā ōārā, waja opamerā āārīburiere āmudi āārīmí. ²³Musā piriro marīrō gūñaturari merā Cristore būremumākū, ĩgū musārē tauri kerere kātibirimakū, Marīpū musārē ĩgū pūrogue ĩgū merā āārīmākū irigukumi. Iri kerere musā pédeare āārīperero i ūmu marā pépereakōāma. Yū Pablode iri kerere weretamugūta āārā.

**Marīpū Pablōre Jesúe
būremurārē iritamudoredea**

²⁴Cristo marí ĩgūyarā āārīburiere curusagie boagu, būro űērō taridi

āārīmí. Marí Cristore būremurí bumarā, ĩgūyarāta āārīsīā, ĩgūya dupū irirosū āārā. Irasirirā ĩgūyarā āārírí waja űērō taria. Marí űērō tariburo dūyāa dapa. Irasirigu yude ĩgūrē būremurārē iritamudagu, űērō taria. űērō tarikeregu, ūsyūā. Pūrugue marí űērō tariri pererokoa. ²⁵Marīpū yūre Jesúre būremurārē iritamubure, musāya āārīburiere ĩgūya kerere musārē werepeobure pími. ²⁶Iripoegue wári buri marārē iri kerere masīpeomākū iribriunadi āārīmí. Dapora marārē ĩgūyarārē irire ōārō masīpeomākū yámi. ²⁷Irasirigu iri kerere iripoegue marā masībiriideare musā judío masaka āārīmerādere masīmākū gāāmemi. Iri kere āsū ārā: “Cristo ĩgūyarāguere āārīmí. Irasirirā ūmugasigie ĩgū ōātariro āārīrōgue ĩgū merā āārīrākuma”.

²⁸Gua Cristoyamarēta werea. Āārīpererārē ĩgūyare pémasīdorerā, āārīpereri Marīpū guare masírí sírí merā buea. ĩgū gāāmerosūta iridorerā, ĩgū merā ōārō āārīburo, ārīrā, werea. ²⁹Irita āārā yū moārí. Cristo turari sīdero bokatīūrō masakare ĩgūyare bue, ĩgūsāya āārīburiere Marīpūre sērēbosāa.

2 ¹Ire musā masīmākū gāāmea. Musāya āārīburiere, Laodicea marāya āārīburiere, āārīpererā yūre iāmerāya āārīburiere būro gūñā, Marīpūre sērēbosāa. ²Āsū ārī sērēa Marīpūre: “Guapū, ĩgūsārē ōārō yūjupūrākumākū irika! Ōārō gāme māírí merā āārīrikumākū irika! ĩgūsārē mu magūyamarē ōārō pémasīmākū irika! Mu magūyamarē pémasírā, gūñaturari merā āārīrikurākuma. Iripoegue marā masībiriideare ōārō masírākuma”, ārī sērēbosāa. ³Cristo dita āārīpererire ōārō masīgū, ōārō pémasīgū āārīmí. ĩgū dita marírē ĩgūyamarē masīmākū irigu āārīmí. Irire masírā, ōātariire masía. ⁴Gajerā musārē ōārō pēsuyurí werenírí merā ārīgatobokuma, ārīgū, irire werea. ⁵Yū musā watopegue āārībirikeregu, musā merā āārīgū irirosū péñāa. Musārē būro gūñāa. Musā Cristore gūñaturari

merā òārō b̄remurirē musā òārō
 āārīrikurire p̄egu, us̄yāa.

⁶Irasirirā marī Op̄u Jesucristore
 b̄remurā īgūrē musā
 b̄remunūgāderosūta: “Yure
 iritamugukumi”, āri b̄remunī, ūmurīkū
 īgū merā òārō āārīnīkōāka! ⁷Īgūrē òārō
 masirā, īgūyare irirā āārīka! Gajerā
 musārē buederosūta piriro marirō
 gūñaturari merā īgūrē b̄remunemoka!
 Ūmurīkū Marīp̄ure: “Ōāa”, āri, us̄yari
 sika!

**Jesúre b̄remurā Marīpu merā
 òārō āārīrīmarē gojadea**

⁸Ōārō pémasika! Masaka īgūsā
 gāāmerō buerire, īgūsā ārīgatorire
 pébirīkōāka! Īgūsā iripoegue marā
 āārīrikudeare, īgūsā basi i ūmumarē
 īgūsā gūñarirē buema. Gajerārē
 Jesucristoyare buerā meta āārīma. Īgūsā
 īgūyare pirīmakū iriduarā, irasū buema.

⁹Cristo, marī irirosū dup̄ukugu āārīgū
 āārīpereri Marīpu āārīrikurire opagu
 āārīmi. ¹⁰Musā Cristoyarā āārīmakū,
 Marīpu musārē īgū irirosū òārā āārīmakū
 yāmi. Cristota ūmugasi marā, i nikū
 marā, deyorā, deyomarirā āārīpererā
 oparā nemorō Op̄u āārīmi. Irasirirā
 ārīgatori merā buerārē pébirīkōāka!

¹¹Cristoyarā āārīsīā, dup̄uma
 gasirogārē wiirisūbirikererā, wiirinerā
 irirosū āārā. Masaka musārē irasū
 āārīmakū iribirima. Marīpu gapu musā
 Cristoyarā āārīmakū, musārē īgū merā
 taudi āārīmī, musā ñerī ūaribejarire
 piriburo, ārīgū. ¹²Musā Cristoyarā
 āārīsīā, deko merā wāyesūrā, Cristo
 boa, yāasūderosūta musāde īgū merā
 boa, yāasūnerā irirosū waabu. Boanerā
 ñerirē neō irinemomasībema. Irasirirā
 musā wāyesūrā, musā iripoegue ñerō
 iriunadeare piririre īmurā iribu. Musā
 irasū wāyesūmakū, Marīpu Cristo
 boadiguere masūderosūta musādere īgū
 merā masūnerā irirosū āārīmakū iridi
 āārīmī. “Marīpu īgū turari merā Cristore
 masūdi āārīmī”, āri b̄remumakū,
 musārē irasiridi āārīmī òārī gapure
 iriburo, ārīgū. ¹³Iripoeguere wiirā

ñerō iridea waja peamegue waabonerā
 āārīnerā āārībū. Marīp̄uyarā āārībirisīā,
 irasū āārīnerā āārībū. Īgū dorerire
 opabirisīā, irire iribirinerā āārībū.
 Daporare pama Marīpu marirē īgū
 merā irasū òārō āārīnīmurā āārīmakū
 yāmi. Cristo boadea merā irasū yāmi.
 Īgū boadea merāta āārīpereri marī ñerī
 irideare kātidi āārīmī. ¹⁴Iripoegue
 Marīpu īgū dorerire marirē: “Āsū
 irika!” āri pīdi āārīmī. Marī iri dorerire
 tarinūgānerā āārīkererū, Cristo
 curusague boadea merā marī ñerī iridea
 wajare kātipeokōādi āārīmī. ¹⁵Irasū
 āārīmakū, Cristo curusague boari merā
 wātēa oparārē, īgūsārē dorerā turarārē
 tarinūgākōādi āārīmī. Irasirigu īgū
 īgūsārē tarinūgādeare gajerārē masīmakū
 iridi āārīmī.

**Ūmugasimarē, Marīp̄uyare
 irituyaka! āri gojadea**

¹⁶Irasirirā gajerā musārē doreduarā:
 “Irire baarā, irire iirirā ñerirē irirā yāri”, āri
 werewuamakū irasū pékōāka! Bojorīkū,
 abe deyoanarīkū, semanarīkū bosenurī
 āārīrīnūrīrē īgūsā judfo masaka irirosū
 musā iriduabirīmakū werewuaridere
 irasū pékōāka! ¹⁷Iripoegue Marīpu
 marirē īgū dorerire pīdi āārīmī, īgū
 marirē Cristo merā iritamuburire
 pémasīburo, ārīgū. Daporare Cristo iri
 dorerire iripoegu ejadigū āārīmī marī
 ñerō iridea waja taubu. ¹⁸Īgūsā musārē
 doreduarā: “Gajerā nemorō āārā”, āri
 gūñakererā, masaka péuroge: “Gajerā
 nemorō āārībea”, āri weregorenama.
 Marīp̄ure wereboerārē b̄remurā,
 īgūsārē: “Iritamuka guare!” āri sērēma.
 “Kērō irirosū Marīpu guare īmudeare
 īābu”, ārīmoāmarā: “Masītarinūgārā
 āārā”, āri gūñadima. Īgūsā basi gūñarōsū
 yāma. Irasirirā musārē: “Gua irirosū
 iribirīmakū, diayemarē iribeā”, āri
 werewuamakū irasū pékōāka! ¹⁹Īgūsā
 Cristore b̄remubema. Marī gapu īgūrē
 b̄remurī bumarā, īgūyarā āārīsīā,
 īgūya dupu irirosū āārā. Īgūta marirē
 doregu, marī dipuru āārīmī. Irasirigu,
 Marīpu gāāmerōsūta marirē īgūya dupu

irirosū āārīrārē gāme iritamu, īgūrē
buremunemomakū yāmi.

²⁰Musā, Cristo boaderosūta īgū merā
boanerā irirosū waanerā āārīsīā, musārē
doreduarā i ūmumarē īgūsā gūñarōsū
buerire buremubirikōāka! Musā ñerō
iririre pirikererā, Cristoya buerire
buremukererā, ñnasirirā īgūsā dorerire
iriduarī dapa? ²¹Īgūsā gāamerōsū āsū ārī
buema: “Irinorē baabirikōāka! Irinorē
ñēābirikōāka!” ārīma. Īgūsā irire irasū
ārīmakū, ñnasirirā īgūsā dorerire yujuri?
²²Īgūsā doreri: i ūmuma bereburi,
masaka īgūsā gūñarī merā bueri āārā.
Irasiriro wajamāa. ²³Īgūsā dorerire irirā:
“Marīpuyare oārō masirī merā īgūrē
buremurā yāa”, ārī gūñadima. Īgūsā
dupure ñerō tarimakū irirā, “Goepeyari
merā Marīpūre buremurā yāa”, ārī
gūñadima. Īgūsā dorerire irirā, masaka
péurogue: “Gajerā nemorō āārībea”,
ārī weregorenakererā, diayemarē irirā
irirosū iriadima. Īgūsā dorerire irikererā,
īgūsā ñerī ūaribejarire piribema.
Irasiriro īgūsā doreri wajamāa.

3 ¹Marīpū Cristore boadūegere
masūderosūta musādere īgū merā
masūnerā irirosū āārīmakū iridi āārīmī
ōārī gapure iriburo, ārīgū. Irasirirā
musā iro dupuyuro ñerī irideare piri,
ūmugasimarē Cristoyare gāameka!
Iroque Cristo īgū Pagu diaye gapū
doagu āārīpererārē doregu āārīmi.
²Ūmugasimarē gūñanika! I ūmumarē
gūñanībirikōāka! ³Musā Cristoyarā
āārīsīā, īgū boaderosūta musāde
īgū merā boanerā irirosū waanerā
āārībū. Irasirirā boanerā ñerirē neō
irinemomasimerā irirosū musā iripoegue
ñerō iriunadeare piribu. Daporare Cristo
merā Marīpū pūroque masaka īāberogue
perebirī okari opamurā āārā. ⁴Irasirirā,
Cristo marīrē okari sīgū i ūmugue
dupaturi aarimakū, ūmugasigū īgū
gosewasiri āārīrōgue īgū merā waarākoa.

**Iro dupuyuro ñerī irideare
pirika! ārī gojadea**

⁵Irasirirā i ūmuma ñerī iririre
pirikōāka! Neō sugu mojōsiabirikeregu,

nomeō merā āārībirikōāka! Neō
sugo mojōsiabirikerego, ūmū merā
āārībirikōāka! Ñerā seyaro ñerō irirā
irirosū iribirikōāka! Ñerī ūaribejarire
iribirikōāka! Gajinorē opaduarā, būro
gāamebirikōāka! Masaka Marīpūre
gāamerō nemorō gajino gapure gāamerā,
keori weadeare buremurā irirosū
yāma. ⁶Iri ñerirē irirā, Marīpū dorerire
tarinūgārā āārīma. Irasirigu īgūsārē
būro wajamoōgukumi. ⁷Iripoegure iri
ñerirē irirā irirosū musā āārīuanerā
āārībū. ⁸Dapora āārīpereri i ñerirē
pirika! Guarire, sītīrīrē, gajerārē
ñerō gūñarīrē, gajerārē ñerō kere
werenīrīrē, ñerī guyasūrī werenīrīrē
pirikōāka! ⁹Gāme ārīgatobirikōāka!
Musā Cristoyarā āārīsīā, musā
īgūyarā āārīburi dupuyurogue
āārīrikuunaderosū neō āārībea. Musā
ñerī iririkuunadeare pirinerā āārā.
¹⁰Musā Cristoyarā ñajāmakū, Marīpū
musārē maama āārīrikurire opamakū
iridi āārīmī. Irasirigu musārē īgū oāgū
āārīrōsū āārīmakū yāmi. Musārē īgūrē
ōārō masīnemoburo, ārīgū, irasū
yāmi. ¹¹Irasirirā marī Cristoyarā
āārīrā: judío masaka, judío masaka
āārīmerāde, dupuma gasirogārē
wiirisūnerā, wiirisūbirinerāde, gaji
nikū marā, masīmerāde, moāboerimasā,
moāboerimasā āārīmerāde, Marīpū
īūrōrē sūrosū āārā. Cristo marī
āārīpererā Opū āārīmi. Irasirigu
āārīpererā īgūyarā merā āārīmī.

¹²Irasirirā musā Marīpū beyenerā,
ōārā, īgū maīrā āārīrā āsū āārīrikuka!
Gajerārē bopoñarī merā īāka! Īgūsārē
ōārō ūsuyari merā iritamuka! “Gajerā
nemorō āārā”, ārī gūñabirikōāka!
Musārē ñerō irikerepuru, irasū
pēñakōāka! Gūñaturaka! ¹³Guari
marīrō gajerārē bopoñarī merā īāka!
Gajerā merā gāme turianerā, īgūsā
musārē ñerō irideare īgūsārē kātika!
Marī Opū musā ñerī irideare kātidi
āārīmī. Īgū kātiderosūta musāde musā
merāmarā musārē ñerō irideare kātika!
¹⁴I doreri nemorō musārē: “Gajerārē
būro maī buremuka!” āārā. Musā

irasirirā āārīpererā gajerā merā oārō āārīrākoa. ¹⁵Marīpū marīrē siuñajārī merā āārīrikumakū yāmi. Irasirirā musā merāmarā merā oārō āārīka! Marī īgūyarā su bumarārā āārā. Marīpū marīrē irasū āārīmurārē pīdī āārīmī. Irasirirā īgūrē: “Ōāa”, ārī, usuyari sīnikōāka!

¹⁶Cristoya kerere gūñanfīkōāka, irire masīnemomurā! Ōārō pēmasīrī merā īgūyare gajerārē bueka! Goepeyari merā wereka, īgūsāde īgūyare oārō iriburo, ārīrā! Irasirirā Salmos wāikuri gojadea pūgue Marīpūya bayarire, gajī īgūrē būremurī bayarire īgūrē bayapeoka! Ōārō gūña būremurī merā bayapeoka! Irasirirā Marīpūre: “Ōāa”, ārī, usuyari sīka! ¹⁷Marī Opū Jesūs usuyaburosūta āārīpereri musā iririre, āārīpereri musā werenīrīrē oārō yūjūpūrākuri merā irika! Irasirirā, Jesūs iritamurī merā Marīpūre: “Ōāa”, ārī, usuyari sīka!

**Pablo Jesúre būremurārē:
“Āsū irika!” ārī gojadea**

¹⁸Musā marāpūkūrā nome, Cristo marī Opūyarā nome āārīsīā, musā marāpūsāmarārē oārō yūjūka! ¹⁹Musā marāpokūrā, musā marāposā nomerē maī būremuka! Īgūsārē turībirīkōāka! ²⁰Musā īgūsā pūrāde āārīpereri musā pagūsāmarā dorerire tarīnūgābirīkōāka! Musā irasirimakū, marī Opū oārō usuyagukumi. ²¹Musā īgūsā pagūsāmarāde musā pūrārē turī, īgūsārē guamakū irībirīkōāka, bujawereri merā yūjūpūrākuri, ārīrā! ²²Moāboerimasā, āārīpereri musā oparā ī ūmu marā dorerire yūjūka! Īgūsā īūrōrē, īgūsā īāberoguedere oārō moāka! Īgūsā musārē oārō gūñaburire īgūsā īūrō direta oārō moāmakū oābea. Musā, marī Opūre goepeyari merā būremurā āārīsīā, musā oparādere oārō merā yūjūka! ²³Āārīpereri musā iririre, oārō yūjūpūrākuri merā irika! Masakare moāboekererā, diayeta marī Opūre Cristore moāboerā āārā. Irasirirā musā oparārē oārō moāboeka! Irasū moāboerā, Cristore moāboerā irirosū

yāa. ²⁴Musā irasirimakū, Cristo musārē wajarīgukumi. Īgūyarārē: “Āsū sīgura”, ārīdeare musārē sīgukumi. Musā irire masīa. Musā marī Opūre Cristore moāboerā āārā. Īgūta musā Opūgōra āārīmī. ²⁵Marīpū ñerō irirārē īgūsā ñerō iridea waja wajamoāgukumi. Īgūsārē āārīpererārē surosū īāgū, keoro wajamoāgukumi. Neō sugu tariwerebir ikumi.

4 ¹Musā oparā, musārē moāboerimasārē diayemarē irika! Īgūsārē oārō opaka! Ire musā masīa. Musāde Opū opāa. Musā Opū ūmugasigue āārīgū Marīpū āārīmī.

²Ūmurīku oārō gūña pēmasī, Marīpūre sērēnikōāka! Īgūrē: “Ōāa”, ārī, usuyari sīka! ³Marīpūre guaya āārīburidere sērēbosaka! Gua Cristoya kerere iripoegue marā masībirideare gajerārē bueduakoa. Irasirirā Marīpūre gua īgūsārē iri kerere oārō bueburire sērēbosaka! Yū iri kerere wereri waja daporare peresugue āārā. ⁴Irasirīgū Marīpūre yaa āārīburire musā sērēbosamakū gāāmea. Marīpūre īgū dorederosūta Cristoya kerere gajerārē pēmasīma oārō yū wereburire sērēbosamakū gāāmea.

⁵Jesúre būremumerārē pēmasīrī merā oārō irika! Īgūsārē īgūyare wereka! Īgūsā merā musā āārīrōpā īgūsārē oārō irika, īgūsāde Jesúre būremuburo, ārīrā! ⁶Gajerā merā weretamurā, oārō merā weretamuka! Ōārī direta werenīka! Musā irasirirā gajerā īgūsā Jesúyamarē musārē sērēnamakū, oārō masīrī merā yūjūrākoa īgūsārē.

Pablo oādoretūnudea

⁷Tīquico, marīyagu marī maīgū, Jesúre būremugū āārīmī. Īgū yū āārīrikurire musārē weregukumi. Marī Opūyare buegu, yū merā moāgū āārīmī. Neō iri moārīrē pirībemi. ⁸Musā pūrogue īgūrē iriua, gua āārīrikurire masī, musārē gūñatura, usuyamakū iriburo, ārīgū. ⁹Onésimo merā īgūrē iriua. Īgūde Jesúyare neō pirībemi. Musāya makāmu, marīyagu marī maīgū

ãārĩmi. Īgūsā pērā gua naásū waadeare
ãārĩpererire wererākuma musārē.

¹⁰Aristarco yu merāmũ, yu
merā peresugue ãārīgũ musārē
õãdoremi. Marcode õãdoremi. Īgũ
Bernabé pagũmũ ãārĩmi. Musā
pũrogue ĩgũ ejamakũ, õãrõ merā
ĩgũrē bokatĩrĩneãka, yu musārē
werederosũta! ¹¹Jesús wãĩkũgu, gajerā
“Justo” wãĩyedi musārē õãdoremi. Īgũ,
Marcos, Bernabé merā yure moãtamurā
ãārĩma. Īisā urredãta gajerā judío
masaka Jesũre buremurā watopeguere
yure moãtamuma, masaka Marĩpu
ĩgũyarārē doreri kerere pėburo, ārĩrā.
Īgūsā yure iritamurĩ merā gũnaturā,
usuyáa. ¹²Epafras musāya makāmũde
musārē õãdoremi. Īgũ Cristoyagu
ĩgũrē moãboegu ãārĩmi. Marĩpũre
sērēgũ, turaro musāya ãārĩburire
sērėbosanĩkõãmi. Marĩpũre õãrõ
gũnaturaní, ĩgũ gããmerõsũ iriburo,
ārĩgũ, irasũ sērėbosami. ¹³Īgũ Marĩpũre
musāya ãārĩburire turaro sērėbosamakũ
ĩãa. Laodicea marāya ãārĩburire,

Hierápolis marāya ãārĩburidere turaro
sērėbosami. Īgũ irasirimakũ ĩãgũ,
musārē irire diaye werea. ¹⁴Duturu
Lucas, marĩ maĩgũ musārē õãdoremi.
Demade õãdoremi.

¹⁵Õãburo marĩyarā Laodicea marā.
Ninfa wãĩkũgode õãburo. Jesũre
buremurā igoya wiigue nerėrãde
õãburo. ¹⁶I pũrē yu gojadea pũrē musā
nerėrõgue bue ĩmu odo, Laodicea
marãdere iriuka, ĩgũsãde ĩgūsā
nerėrõgue bue ĩmuburo, ārĩrā! Irasirĩrā
ĩgũsãrē gaji yu gojadea pũrē ñeãrā,
musãde iri pũrē bue ĩmuka! ¹⁷Ãsũ ārĩka
Arquipore: “Marĩ Opũ Jesũyagu mu
ãārĩmakũ, mure ĩgũ moãrĩrē pĩdi ãārĩmĩ.
Irasirigu irire õãrõ moãyuwarikũka!”
ārĩka ĩgũrē!

¹⁸Yu Pablo, yaa mojõ merā ire
gojãa: “Musārē õãdorea”. Peresugue yu
ãārĩrĩrē gũña, Marĩpũre yaa ãārĩburire
sērėbosaka! Óãrõ ãārĩka musā! Marĩpu
musārē õãrõ iritamuburo.

Iropãta ããrã.
Pablo